


TRANKE

Revista pa Kasá di Diákono - Union Karibe Hulandes - Segundo semèster 2021

**Ki sorto di wardadó abo
i ami ta di Dios Su tou?**



pidjoe



TRANKÉ

E revista aki ta pa rekòrdá nos di dia i anochi ku Dios ta huntu ku e famianan ministerial i tambe rònt di e esposa di diákono i nan famia, manera Job 1:10 ta bisa.

Ku kada parti di e revista i su artíkulonán ta pa pone un trankera rònt di nos kas, rònt di tur loke nos tin i na tur banda.

Huntu ku esei nos tin e responsabilidadat di sirbi ku amor i gradisimentu, pasobra esun ku risibí hopi, hopi ta wòrdu rekerí di dje

KONTENIDO:

➤ **Amor**

➤ **Pasenshi**

➤ **Korekshon**

➤ **Perseveransia**

➤ **Rutina**

➤ **Wardadónan iresponsabel**

NOTA: Tur artíkulo ku no tin nòmber ta kontribushon di editor.

KUIDA PA KARNE TA UN DISIPLINA

Apresiado kasánan di diákono:

Ora nos pensa riba kuantu Señor, ku ta Kabesante di tur wardador, rònt mundu, a hasi pa kada un di nos, esaki siguramente lo move nos kurason, i nos lo bisa, “TATA, tur kos pa Bo!

Nos oportunitat, nos chèns, nos eskoho ta bini UN BIAHA den bida, i esei ta AWOR ku nos t’ei. Awor ku nos tin rosea, nos por hasi un diferensia. Awor ku nos por mira i tende i kana i papia, nos por ministrá na banda di, i huntu ku nos kasá i nos yunan.

I ruman sa, no tin nada mas dushi manera ora nos duna apnegá di nos mes, pa sirbi Dios i Su kousa. Sin hasi distinshon den e karné, ni lamchinan, ni chubatanan. Ni ku nan ta yòn, ni ku nan ta bieu, ni ku nan tin eksperensia, ni ku nan ta nobato. Ni ku nan ta koperá, ni ku nan ta kabesura i ta bai hinka nan kurpa den problema. Si Señor tabatin, i te ainda, E tin hopi pasenshi ku nos, ta nos deber tambe di tin pasenshi i kompreshon pa esnan ku ta rònt di nos, i ku ta den nos tou, na iglesia i na kas.

“Awor e ta keda na boso. Para riba boso tenchi pia— tantu pa boso mes i pa boso kongregashon di karné. Spiritu Santu a pone boso enkargá ku e hendenan aki— Dios Su pueblo nan ta— pa kuida i protehá nan. Dios mes a pensa ku tabata balelapena muri pa nan” (Echonan 20:28, The Message)

Ku Dios por bendishoná i fortalesé kada ruman!

Atentamente,

Anna Maria Manuela Croes





Amor di e wardadó

“Deber ta pone nos hasi e kosnan bon,
pero AMOR ta pone nos hasi nan bunita” ¹

BON wardadornan di karné ta stima nan bestianan di kurason! Nan sabi ku e bestianan ei mester di nan kuido konstantemente pa práktikamente tur kos den nan vida. Di dia i anochi nan ta pendiente di nan karnénan, sin deskuidá ningun di nan, ni e machu, ni e hembra, ni e chikínan, ni e mamanan ku ta gordo pa werp. Nan tur ta pendiente di nan wardador. Di e hopi oranan ku nan sa pasa huntu, esei a krea un laso entre nan i nan bestianan. Pa e wardador no ta un karga kuida pa nan, tene pasenshi ku nan, koregí nan, ni perseverá ku su rutina, pasobra e ta STIMA nan.

NAN TA PASA TEMPU KU NAN. Di dia i anochi e wardador ta pasa tempu ku su bestianan. E sa kua ta obedesido, kua ta chinchirinchi i prufiá, e sa kua ta suak, i kua ta e lider entre nan.

E TA PROVEE PA NAN. E ta tristu ora no tin kuminda pa duna nan. E ta sinti ora e tende nan yora di hamber. E ta hasi tur esfuerso pa sali bai ku nan kaminda e sa tin bon kuminda pa nan kome, yerba ku no tin parásito den dje. E ta hiba nan tambe kaminda tin awa ku ta kalmo pa nan por bebe sin hoga, ya ku awa brutu por bai den nan nanishi ku ta serka di nan boka. I karnénan no sa landa. Si nan lana muha i nan kai den awa, e lana muhá pisá por pone nan hoga si e wardador no ta atento.

E KONOSE NAN. Si e tou no ta muchu grandi, e wardador hopi biaha ta duna kada un un nòmber. E sabi ku si e karné trompeká òf di un forma òf otro e kai riba su lomba, e no por lant'ariba di su mes. E lo muri asina, òf bira kuminda pa bestia feros si e wardador no bin bòltu e bèk. E wardador sa tambe ku nan por spanta di nan mes i haña atake di kurason dor di djis imaginá ku un kachó òf lobo ke ataká nan.


E PORTA. E wardador ta drumi den entrada di porta di e kurá. Nada no por drenta ni sali sin ku e sa. Esnan ku ta paden e por protehá.

DEN IGLESIA. Komparando esaki ku enkargo ku kasá di diákono tin huntu ku su esposo, nos por mira esaki asina:

- Si ta kuida di e tou pa deber, i no pa amor, e por bira un karga i un kansansio. Pero si ta pa amor, ta komo si fuera ta pa Hesus nos ta hasi'è, kontentu, agradesido.
- Nan ta atento pa kada un di e 'karnénan' den nan tou, grandi i chikí, hòmber i muhé, esnan ku ta koperá i esnan ku no ta komportá nan mes bon.
- Nan ta pasa tempu ku nan, den nan sirbishi/ programan. Nan ta bishitá nan. Nan ta kòmbersá ku nan.
- Nan ta proveé e atenshon, e kariño, e kuminda spiritual, e konseho, e spièrtamentu.
- Nan sabi ku Kristu ta e Wardadó Supremo, Doño di tur e karné i lamchinan, i un dia nan tin di duna kuenta di nan bienestar i nan kumplimentu ku nan yamada.

"Stima otro sinseramente. Odia maldat i pega boso kurason na loke ta bon.... Sirbi Señor ku un kurason ferviente." (Romanonan 12:9-11)

¹ *Sword Scrapbook II, p. 154.*



PASTORA

RACHEL tabata un wardadó di karné (Génesis 29:9)

- E wardadó no ta laga su lamchinan dual pèrdè.
- E ta kuida pa nan i ta tene su tou huntú.
- Ora un enemigu bin pa kohe su karné, e ta bringa p'è.
- E ta masha pendiente pa tur ku ke ataká su tou.
- Ku kurashi e ta saka su lamchi for di boka di e enemigu.
- E ta alerta i no ta floho.
- E ta traha un trunké di protekshon pa su karnénan dor di su diligensia pa kuida di nan.
- Ora un lamchi dual, e ta buska te ora e hañ'è.
- E ta regosihá ora e haña su lamchi.
- E ta perkurá pa su karnénan kome.
- E ta antisipá nan nesesidat.
- E konosé nan na nòmber.
- E ta komprondé kada un di nan yoránan. E ta kore bai serka nan.
- E ta duna nan un sentido di pertenesé.
- E ta sigurá ku nan tin un lugá pa sosegá i hunga kaminda e ta wak nan.
- Ora nan ta débil, e ta karga nan den su brasanan.
- E ta subi e seru di mas haltu pa yuda nan si nan a keda pegá.
- Ora nan ta malu e ta kuida nan te ora nan bira bon bèk.
- E ta guia su karnénan.
- Nan konosé su stèm suave i ta sigui'è.
- Su lamchinan sa ku por konfi'è.
- E ta instruí su karnénan, bendishoná nan, i trese nan huntú.
- E ta hiba nan den e kaminda korekto ku disiplina i ku amor.
- E pastora ta keda huntú ku su karnénan.
- E no ta kore hasi wega den un otro kurá, miéntras su bestianan ta dual den tur direkshon.

- E pastora ta bon ku su karnénan.
- E ta mustra nan miserikòrdia i amor.
- E ta generoso i ta bendishoná nan mas di loke bo por spera.
- E ta resa diligentemente pa su karnénan.
- E ta nan pastora pa restu di su bida.
- E ta kultivá su kunuku.
- E ta remové e piedranan i sumpiña.
- Nan lugá di biba ta liber di temor.
- Su tou ta stim'è masha hopi.
- Semper nan ta rònt di dje.
- Nan ta sinti kontentu ora nan mira nan wardadó muhé.

E tin un vishon di término largu pa futuro di su tou, ku e Wardadó Supremo a dun'è.

E ta proveé pa nan un lugá ku nan por yama hogar pa nan ta fuerte i saludabel.

“Sí, bendishon i bondat ta kompañá mi tur dia di mi bida. Lo mi biba den kas di Señor henter mi bida largu.” (Salmo 23:6)



E WARDADÓ A DRUMI

Tabatin un wardadó ku a pega un soño profundo
Asina no tabatin niun hende pa tira bista riba e karnénan.
E karnénan a keda enkantá, liber por fin.
Nan a sigui e lider i a kore limpi bai.

Tur kos tabata bai bon; nan tabata pasa dushi,
Kana pa mianan den sabananan, riba seritunan i riba
tereno infértil i muhá.
Despues solo a baha i nochi a kuminsá sera.
Nan a kuminsá sinti ku libertat tabata serio.

Nan a haña hamber i a sali bai buska kuminda.
No por a haña nada pa kome i a bira resigná.
Tabata duru pa sak abou i purba drumi,
Ya ku algun bestia horibel tabata yag nan tras.

Asina kansá i agotá nan tabata ku nan tabata anhelá
Mara nan tabata bèk den e tou i den e man di seguridat.
Nan a realisá ku nan mester di kuido di nan wardadó,
Pa amor, pa kuminda i lugá di keda ku semper tabat'ei.

Ora ku e karnénan kasi a pèrdè tur speransa,
Un kara konosí a bin na e subida.
Tabata nan wardadó i tur a kore bai serka dje ku gran goso
Pa mustra ku realmente nan tabata kontentu di mir'é.

Nan a primintí ku nunca mas nan lo kore bai
I a resa ku gradisimentu pa e wardadó ku Dios a manda.
Amèn!

Fuente: <https://www.familyfriendpoems.com/poem/the-shepherd-slept>



Pasenshi di e wardadó

PASENSHI

ta fruta di Spiritu Santu. Nos mester di dje kada momentu di nobo den nos bida, pa tur tur kos.

Meskos ku e wardador di karné mester di hopi pasenshi ku su karnénan ku ta slo, kabesura, ku ta kana bai kai gewon for di baranka, i si no paga tinu e otronan tambe ta sigui su tras, kasá di lídernan den iglesia tambe mester tin hopi pasenshi ku tur sorto di hende, ku tur sorto di karakter i kustumber ku nan tin ku atendé kuné i stima nan, pasobra a yama nos pa esei. Dios mester di nos sirbishi, sostén i fieldat.

Pasenshi ta bini dor di perseveransia i dor di soportá trankil, i e ta permití bo respondé na sirkunstansianan frustrante ku gracia i ku dominio—propio. Den Salmu 40:1 David a bisa: *“Mi a spera, spera so den Señor, El a drei mira mi i a tende mi gritu di ousilio.”*

Pasenshi ta bini dor di tin un speransa sólido den Dios Su plannan, especialmente su plannan eterno pa nos. Ora nos sabi ku a lo largo nos futuro ta sigurá, nos por tin mas pasenshi durante frustrashonnan di awe.

Den Santiago 5:7, 8 ta animá nos: *“Rumannan, tene pasenshi anto te dia Señor bini. Wak ku kuantu pasenshi un kunukero ta warda pa su kunuku produsí kosecha presioso! E sa ku e mester warda te ora e promé i e delaster tempu di awa pasa. Boso tambe mester warda ku pasenshi! Para firme, pasobra Señor ta serka di bini!”*

Sea nos ta warda pa kosecha hecha, pa tráfiiko ku ta pegá kuminsá kore atrobe, pa un mucha krese madurá, òf pa Dios perfekshoná nos, nos por krese den pasenshi rekonosiendo ku e kosnan aki ta tuma tempu i tin masha tiki kos abo i ami por hasi pa apurá e proseso.

PROMESA DIVINO: “Soportá ku pasenshi ta loke boso tin mester awor. Pa asina boso por sigui hasi Dios Su boluntat. E ora ei boso lo risibí tur loke El a primintí.” (Hebreonan 10:36)

Tumá for di: DIVINE MOMENTS FOR WOMEN, p. 211

“Mi a bolbe desapuntá Bo!”






Korekshon di e wardadó

“Señor, tuma bo garoti di Wardadó i
mustra bo pueblo e kaminda; protehá
nan manera bo propio trupa, duna nan
un kaminda di skonde ...”


(Mikeas 7:14)



Un karné ta un bestia mansu ku ta dependé di su wardadó di karné. Nos por saka hopi lès for di e karné i e wardadó. Mi ta menshoná algun.

Miembronan skohé pa liderá den iglesia ta manera wardadó di karné. Esun ku ta kuida e karnénan ta sòru pa tur loke nan mester. No tin nada ku e wardadó no ta hasi pa e karné. E ta konstantemente i tempu kompleto na disposishon di e karné. Komo lidernan mester ta sirbidó tur momento, e karné ta konfia su wardadó bou di tur sirkunstansia.

Ta e wardadó ta esun ku ta wak pa e karné ta sigur i ta defendé di tur bestia feros. E konfiansa ku e wardadó ta inspirá serka e karné e konfiansa aki lidernan mester inspirá e miembronan ku ta e karnénan.



Otro aspekto interesante di e karné ta ku nan fortaleza ta den e echo ku nan ta uni pa ta fuerte. Pa un iglesia ta fuerte rumannan mester ta un forsa. E frase union ta hasi forsa tin hopi bèrdad aden. Ora e karné ta su so e ta masha vulnerabel, pero ora nan ta hopi, nan ta muestra un fortaleza. Pa nos logra metanan huntú, pa kumpli ku nos mishon manera Dios ta manda nos, mester uni nos mes pa ta fuerte huntú i komo un solo forsa. Union ta hasi forsa.

Skirbí pa: Sumiré Kastaneer- Willems ku ta kasá di un diákono. Aktualmente e ta un Instruktor den Klup di Patfender i lider di Edukashon na Iglesia di Phlip, Curaçao

ÁNTES meskos ku awor tabatin poko seguridat pafó di e statnan murayá. Bandidonan for di tribunan ku ta biba na frontera, òf bestianan salbahe ku ta sali for di nan lugá di skonde den barankanan, por keda lur pa plünder e tou. E wardadó ta atento na su bestianan, sabiendo ku esaki ta ku peliger pa su mes bida. Jacob ku a kuida pa e tounan di Laban a deskribí su mes trabou inkansabel den Génesis 31:40. I tabata miéntiras e tabata kuida pa karnénan di su tata ku e mucha David a bin topa ku e leon i ber i a reskatá e lamchi hòrtá for di nan boka.¹

Karné mester di kuido i protekshon konstantemente. Nan no ta e kriaturanan di mas sabí i nan no tin un mekanismo natural di defensa. Nan ta dependé riba nan wardador pa libra nan for di peliger i reskatá nan si nan hinka nan kurpa den problema.

E WARDADOR SU MÉTODONAN ²

Ta Premirá Peliger— E wardadó ta entrená e tou pa konosé i sigui su stèm. Esaki ta su promé liña di defensa. E ta disipliná un karné ku dual i ta tuma medidanan preventivo pa koregí tendensianan fatal.

E ta Vigilá— E tou ta enfoke di e wardadó. E ta responsabel pa nan bienestar físiko. Asina e ta marka e paso, konsiente di nesesidatnan partikular di kada karné. Tin karnénan embra— pisá ku bida nobo, lamchinan— sin eksperensia i alegre, chubatanan yòn— kabesura i teritorial (semper tirando kabes) — esnan bieu i malu mester di atenshon èkstra, i esnan ku ta dual— ku ta kontra tur kos (asta pa nan mes bon interés). Wardadónan ta studia e rasa. E ta siña kua ta nan parti fuerte, nan debilidat, i personalidat di kada un. Un tou ku ta prosperá i na pas ta su bendishon i rekompensa.

ARMANAN DI E WARDADÓ ³

Un staf, un slengu i un tas— esaki ta e kosnan ku David a bai kuné na kampo di bataya. E hèrmèntnan ei di wardadó tabata su úniko arma.

E BARA:

- E ta manera chikoti di un polis. Hopi biaha ta trah'é di palu di eik i e tin un kònòpi na su punta. Den e kònòpi aki nan sa bati algun klabu tin biaha pa hasi'é un mihó arma. E ta hopi útil pa protekshon, i niun wardadó ta kana sin dje.
- Sin duda tabata su bara ku David a usa pa protehá su karnénan for di animalnan salbahe (1 Sam. 17:34-36). E ta mensioná tantu e bara i garoti den Salmo di e Wardadó (Salmo 23:4).



BASTON:

- E ta un palu largu di sinku òf seis pia i tin biaha, no semper, e tin un birá na su punta.
- Ta us'é manera hòmbènan di wèst ta usa un garoti pa lèn ariba òf pa kana kuné. E ta pa atendé i dirigí e karnénan, i ta hopi bon tambe pa nan protekshon.

SLENGU:

- Ta trahá esaki di dos pida kabuya, òf kueru i un otro pida kueru pa risibí e piedra. Nan ta drei e 1-2 biaha na laira rònt di nan kabes, pa e kohe spit i despues ta zwai e miéntiras ta laga un di e kabuyanan lòs.
- Apart di usa e slengu kontra animalnan salbahe i ladron, e ta hopi útil tambe pa dirigí e karnénan. Por tira un piedra serka di un karné ku ta keda patras i spant'é pa bin mésora bèk den e tou.
- Of si un karné ta bai den un otro direkshon, ta tira un piedra djis mas ayá di e karné ku a dual, i asina tresé bèk serka e otronan.

MINISTERIO DI KOREKSHON TA NESESARIO DEN E FAMILIA DI DIOS ⁴

Hopi biaha bo por koregí un miembro di e kurpa kende e pastor òf ansianonan no por koregí efektivamente, pasobra abo konosé e persona mihó ku nan. E ta bo amigu(a), asina ta mas probabel ku e lo skucha na abo ku na un otro hende ku e no konosé. Pero tòg no ta fásil pa hasi esei.

Korekshon no ta un delikadesa; e ta un nesidat. Si nos bida drif bai den mal kaminda i sigui den e mal direkshon ei e por resultá den noufragio di nos fe. Pa e motibu ei, Dios ke pa kada kreyente ta envolví den e ministerio di korekshon. Hopi biaha un ruman por ta kitando for di kaminda anto e mes no ta ripará esei. Dios ta yama nos pa koregí e persona ei ku amor.

Loke por stroba korekshon:

- Miedu. *Eze. 3:17-21; Ech. 20:28*
- Un malkomprendementu. *Mat. 7:1*
- Konsiente di pikánan personal. *Gal. 6:1*
- Flohera.
- Loke ta konsiderá moralmente korekto.
- Inseguridat.

Hasi bo mes algun pregunta promé:

- Mi bida ta un ehèmpel? *1 Tim. 4:12*
- Mi tin un relashon adekuá ku e persona? *1 Tim. 5:1, 2; 1 Tes. 2:7-11*

- Mi tin e echonan? *Prov. 18:13, 17*
- Mi tin e motibu i ophetivo korekto? *Mat. 18:15; Gal. 6:1; Kol. 1:28*
- Mi tin e palabranan korekto? *Mat. 18:15*
- Ta Dios Su tempu pa mi bai? *Sal. 38; 51*
- Mi ta prepará pa riska rechaso i atake?

Prosedura pa koregí:

- Sea mes privá ku loke ta robes. *Mat. 18:15-17*
- Sea kuidadoso i sabí. *1 Tim. 5:2; Gal. 6:1*
- Sea dirèkt i habrí. *Gal. 2:11*
- Sea humilde i no huzga. *Gal. 6:1*
- Sea kariñoso, pero firme. *1 Tim. 5:1; 2 Tim. 2:25*
- Ta kapas di must'é na Dios Su palabra i na e stapnan nesario pa restourashon.
- Persistí si ta nesario. *Ech. 20:31; Santiago 5:19, 20*

¹ The Desire of Ages, p. 479.

² [The Job Description Of A Shepherd – APOSTOLIC INFORMATION SERVICE](#)

³ [Manners & Customs: Shepherd life; the care of sheep and goats | AHRC \(ancient-hebrew.org\)](#)

⁴ [Lesson 15: The Ministry Of Correction \(1 Timothy 5:1-2\) | Bible.org](#)




Perseveransia



Skirbí pa: Claudette Anastatia

di e wardadó



bida i trabou di un wardadó di karne tin su sakrifisionan, e tin su penanan, pero e tin tambe goso i alegría.

Tin varios lèsnan ku nos por siña for di e wardadó i su perseveransia.

- Lokual e wardadó ta hasi ta di keda ku su karnénan 365 dia. E no ta bandoná su tou.
- E wardadó ta traha un kurá di protekshon pa su karnénan por pasa anochi, pa spar nan kontra lobonan, tambe kontra bientunan fuerte. Dependé e direkshon di e bientu, e ta pone yerbanan rònt di e kurá pa kòrta e bientu ku ta bati nan demasiado.
- Asta tin peligerman di paden tambe ku e wardadó mester vigilá.
- E wardadó mester pasa den temporada di awaseru i sneu. E wardadó mester suportá tur e mal tempunan.
- Nan no tin dia liber ni dia di fiesta. Nan mester ta pendiente di e tou.
- E wardadó ta hañ'é ku karnénan ku ta someté i ta laga nan mes wòrdu guia, pero tin tambe esnan ku no ke wòrdu guia ni dirigi. E wardadó mester stima i alkansá tur dos grupo.

Isaias 53:6 e promé parti ta bisa: *“Nos tur a kana dual manera karné, kada un a kohe su mes kaminda.”*

Mateo 9:36 *“I ora ku El a mira e multitudnan El a sinti kompashon pa nan, pasobra nan tabata kansá i plamá, manera karné sin wardadó.*

Hesus a sinti kompashon di e hendenan. E ta bisa den Juan 10:11 *“Ami ta e bon Wardadó; e bon Wardadó ta duna su bida pa e karnénan.*

E wardadó tin un kurason sensibel pa e tou. E ta duna su bida pa e karnénan. Ora peliger aserká e ta lucha pa protehá su tou. E karnénan konosé nan wardadó i ta stim'é.

Den e buki El Deseado de Todas las Gentes, página 445 nos ta lesa: *“Miéntras e wardadó ta guia su tou riba seritunan ku klep, dor di mondinan, i partinan mas profundo di e desierto, na e partinan kubrí ku yerba banda di e riunan, miéntras e ta kuida nan den e serunan durante anochinan solitario, e ta protehá nan for di ladron i ku ternura e ta atendé esnan malu i débil, su bida ta bira un ku nan. Un fuerte laso di kariño ta uni e na e ophetonan di su kuido. Pa grandi ku su tou por ta, e wardadó konosé kada karné. Kada un tin nan nòmber, na kua e ta respondé ora ku wardadó yam'é.”*

Por konsiderá e diákononan den iglesia komo wardadó di karné, kualnan ta e rumanan den iglesia. Pero skirbiendo pa e kasá di diákononan, nos no ke separá e trabou di diákono for di esun di su esposa, pasobra huntu nan ta laborá pa kuida e karnénan di Dios Su tou.

Manera nos a mira ta un trabou di sakrifisio. Tin momento di sinti pena. Tambe tin momento di goso i alegría. Manera e wardadó ta protehá, vigilá, i ta traha kurá di protekshon rònt di e karnénan, asina e esposa di e diákono mester yuda kuida pa e tou. Mester protehá for di e peliger di pafó, meskos tambe for di e peliger di paden.



“Tin hende muhé ku mester traha den e Ministerio Evangéliko. Den hopi aspekto nan por hasi asta un mihó trabou ku e minister nan ku tin biaha ta deskuidá di bishitá e tou di Señor. Ora ku ta posibel, tur dos e esposa i e esposo mester uni den e trabou.

Tin un kaminda habri pa e muhé nan kon-sagrá. Pero e enemigu ta alegrá si e muhé nan aki di kua Dios por usa pa yuda sentenáres di persona, dediká nan tempu i esfuerso na un kriatura so ku ta rekeri kuido i atenshon konstante.” Manuscript Releases 325-326. (HD 250 4).

**Mi kerida esposanan di diákono,
Dios tin un trabou balioso pa
wòrdu hasi. Tin biaha e yerba
por a kaba; mester bai buska un
lugá bèrdè yen di yerba atrobe.
No laga e karné nan sin kuminda.
Buska métodonan nobo pa e tou
ta bon alimentá, pero tene na
mésun prinsipio.**

- E prinsipio ta fundamental, pero nos por kambia e método hasié atraktivo, sin mi-shi ku prinsipio.
- Tin na man pan fresku pa alimentá grandi i chikí.
- Kada karné tin su partikularidat. E mester wòrdu atendé segun su nesesidat.
- Pero nos mester konosé nos karné nan i nan tambe ta konosé nos.

Isaias 40:11 ta bisa: “Manera un wardadó di karné, E ta kuida Su tou, E lo kohe e lamchinan den Su brasa, i tene nan serka di Su kurason.”

Hesus ta nos bon ehempel!

Bon Dios bendishoná bo.

Claudette Anastatia ta maestra di Sabat Skol i lider di un grupo chikí na iglesia di Tera Kòrà, Curaçao.

Kansansio?

Sinti laf?

Desgustá?

Konformá?

Bon?



Skirbí pa: Margaritha Maduro– Elizabeth

Rutina di e wardadó





ra e palabra rutina bini na nos mente, mesora nos ta pensa riba algu ku a bira un kustumber, no ta bèrdat? Si bo ripará, hende por lo general gusta hasi kos un rutina. Kisas pa kos bai mas fásil òf flohera pa no tin mester di kibra kabes pa buska otro manera di hasi kos.

Awor ora nos pensa riba un wardador, laga nos konsentrá riba un wardador di karné, mayoría di wardador di karné tin un rutina. Di kon? Karné i lamchinan ta bestianan masha tièrnu, ku mester di atenshon konstantemente, den e sentido, pa guia nan kaminda nan por haña kuminda i awa fresku tur día. Dios Su palabra ta bisa nos den Huan 10:11: “*Ami ta e bon wardador: e bon wardador ta duna su bida pa e karnénan.*” E wardador di karné mester tin hopi pasenshi i táktika pa guia e tou, e no mester sinti su mes fadá.

Dios tambe tin su wardadornan di karné i Su karnénan, maske nos mester tene na kuenta, ku Kristu ta e Wardador Prinsipal, pero nos tambe tin ku traha den un “tim” pa guia e karnénan, ku ta nos miembronan di iglesia. Nos tarea prinsipal ta pa alimentá e tou, fortalese esnan deskurashá, atendé esnan ku ta kibrá di kurason i di spiritu, trese bèk esnan ku a dwalu, buska esnan perdí, tur esaki no pa medio di forsa òf obligashon.

E bon wardador lo bandoná henter e tou pa buska un karné ku a pèrdè. E wardador mester ta atento pa no pèmití lobonan yega serka i ataká e karnénan i lamchinan. E wardador konosé su karnénan pa nòmber, e ta guia nan i ta bai nan dilanti.

Nos tin sigur, ku komo esposa di diákono den iglesia bo ta gusta e ministerio aki, kual bo ta forma parti di dje, yudando e diákono (wardador) den e trabou importante aki.

E salmista i wardador di karné, David, ta bisa nos den Salmo 23:1: “*Señor ta mi wardador, mi no tin falta di nada*”. Pues si nos tin mester di sabiduria pa aktua den kualkier situashon, laga nos aserká Señor pa medio di orashon ku un kurason humilde i ku frankesa i ta sigur ku E ta kontestá nos segun Su santu i divino boluntat.

Un kristian ku ta rutinario, ke men e ta hasi e kosnan outomátikamente, sin pensa, sin emoshon i sintimentu, un kristian asina no tin goso den lokual ku e ta hasi i esaki ta strob'é den desaroyá spiritualmente, e ta sirbi Dios i hende komo un obligashon.

Tin biaha “karnénan” por ta tèrko i no ta obedesé instrukshonnan. Pero ku pasenshi i orashon, suplikando na Dios pa sabiduria e wardador lo logra i tin èksito den su ministerio ku Dios a konfia na dje.

“Pastoriá e tou di Dios meimei di boso, hasiendo e trabou di kuidadó, no forsá, ma boluntariamente, segun e boluntat di Dios; I no pa ganashi deshonesto, sino ku hopi afan, no manera hende ku tin dominio riba esnan ku a wòrdu konfiá na boso, ma siendo ehèmpel pa e tou. I ora ku e Wardador prinsipal paresé, boso lo ri-sibí e korona di gloria ku no ta marchitá”. (1 Pedro 5:2-4)

Margaritha Maduro Elizabeth ta ansiano na Iglesia di Mundu Nobo, Curaçao

WARDADORNAN



Skirbírpa: Mirugia Leocadia– Zink

IRESPONSABEL!

1 Korintionan 4:2 "Ta rekerí di kada mayordomo ku kada un wòrdu haña fiel."



KEN TA UN KUIDADÓ DI KARNÉ?

Un kuidadó di karné mester ta un hòmber balente pa e por defendé su karnénan di kualke peliger ku nan por enfrentá, e mester ta generoso i ku ta stima animal. E mester ta eksperto den sa kon guia e karnénan na lugánan adekuá i por proveé bon alimento, evitando di duna nan yerba ku ta venenoso. E mester ta un ku no ta buska su mes komoditat, pero, semper e ta vigilá pa protehá i favorese su tou. Tur e kualidatnan aki ta hiba na dos kos: konosementu i amor.

Un bon kuidadó di karné mester konosé kada un di su karnénan i tambe e mester laga su karnénan konosé. Esaki ta posibel solamente ora tin aserkamentu i tratu kada dia ku e karnénan. E tin ku dediká tempu, hopi tempu pa mira i sa kua ta e nesidat di kada un di su karnénan i loke kada un por i ta bal.

Un kuidadó di karné ta biba kansá, i ta gasta su tempo pa su karnénan. Pa su karnénan e ta pone asta su bida na peliger, asta e ta troka su mes den kuminda i remedi pa nan.

Pero tin biaha nos ta haña e kuidadónan di karné ku ta bini na trabou djis pasobra nan ta wòrdu pagá. Nan ta djis kumpli ku e oranan di ta na trabou, pero nan no tin amor pa e karnénan. Nan no ta kuida nan manera mester ta. Nan ta traha pa nan por wòrdu pagá fin di luna i esei pa nan ta sufisiente.

Pero kiko ta pasa ora un karné hañ'é den problema? E ta tira falta ku ta e karné a bai e kaminda ekiboká, pero no ta bisa nunca ku ta e no a tira bon bista riba e karné. Su amor tabata pa su salario ku e ta kobra fin di luna na lugá di e amor ku mester tin pa kuida e karnénan ku e shon a laga na su enkargo.

Nos por kompará esaki meskos ku un trabou di diákono.

Un diákono di iglesia ta kuida, konsehá, orientá, instruí i tin e alegria di mas grandi di su bida ora e mira un alma entregá su bida na Hesus. Hóbennan ta busk'é, adultonan ta atento na loke e ta papia, e grandinan ta risibí konsuelo a traves di su palabranan. E ta e promé ku ta yega i esun último ku ta sali di iglesia.

Awor, komo e kasá di diákono ki ròl bo tin den iglesia?

Ròl di e kasá di diákono mester ta meskos ku e diákono. Nan dos tin ku traha huntu pa bienestar di e iglesia. Nan ta un ekipo ku lo kuida pa e karnénan di iglesia despues di e pastor. Tambe e tin e deber di kuida e karnénan resién boutisá pa nan por sinti nan mes aseptá den e famia di iglesia.

Deber di kasá di un diákono mester tin més-un virtutnan ku e diákono, kual ta:

- Mester ta un persona konsagrá.
- Mester ta dediká na e obra di iglesia.
- Mester ta madurá den su relashon ku e rumannan di iglesia.
- Mester papia semper ku un spiritualidat elevá.
- Mester ta un persona respetá i tranquil,
- Mester ta un persona ku ta praktiká prudensia, ternura i tin bon manera. 1 Timoteo 3:11 ta bisa "e mester ta digno, no kalumniadó, sino moderá, fiel den tur kos."

Komo kasá di diákono, e huntu ku e famia, mester ta instrumènt den e mannan di Dios. Debolbé su diesmonan i su pakto sistemátiko i instruí otronan pa hasi meskos. Nan mester ta semper atento na e yamada pa ta presente na tur kulto i reunion.

I manera 1Timoteo 3:8-13 ta bisa: *“Diákononan tambe mester ta hòmbènan digno, kendenan no ta papia ku dos lenga, ni ta bisiá na hopi biña, ni ta golos pa plaka, kendenan ta warda e misterio di fe ku un konsenshi limpi. I laga esakinan tambe wòrdu probá promé; e ora ei, laga nan sirbi komo diákono, si nan ta sin reproche.”*

“Di e mésun manera, nan muhénan mester ta digno, no kalumniadó, sino moderá, fiel den tur kos. Laga diákononan ta esposo di ún esposa so, kendenan sa di manehá nan yunan i nan mes kas. Pasobra esnan ku a sirbi bon komo diákono ta optené pa nan mes un grado di honor i hopi konfiansa den e fe ku ta den Kristu Hesus.”

E tèst aki ta loke ta identifiká e diákono i su kasá. Ohalá ku nos por ta fiel den hasi Señor Su trabou dignamente. Kòrda semper ku nos rekompensa lo ta den e reino di shelu. Y manera Señor a bisa: Ora boso hasi e kosnan aki na un persona, kòrda ku ta na AMI boso a hasi'é.

Ku Dios por bendishoná trabou di e diákono i su kasá pa asina nan por hasi un trabou di amor pa e obra di Dios.

Mirugia Leocadia-Zink ta tesorera i líder di Ministerio di Orashon i Salú na Mishon Aruba



